



MEMORIA XUSTIFICATIVA DO CONVENIO DE COLABORACIÓN ENTRE A VICEPRESIDENCIA PRIMEIRA E CONSELLERÍA DE PRESIDENCIA, XUSTIZA E DEPORTES E O COLEXIO OFICIAL DE PSICOLOXÍA DE GALICIA PARA A COLABORACIÓN NA EMISIÓN DE INFORMES PERICIAIS PSICOLÓXICOS

A Vicepresidencia Primeira e Consellería de Presidencia, Xustiza e Deportes é o órgano da Administración Autonómica que ten atribuído o exercicio das competencias en materia de xustiza en virtude do artigo 20 do Estatuto de autonomía de Galicia, aprobado pola Lei orgánica 1/1981, do 6 de abril. É desexo desta Vicepresidencia Primeira e Consellería a realización de todas aquelas actuacións coas que poida acadarse a maior eficacia en relación cos temas da Administración de xustiza en xeral, segundo as funcións que lle atribúe o Decreto 117/2022, do 23 de xuño, que establece a súa estrutura orgánica e que seguirá sendo de aplicación coas modificacións introducidas polo Decreto 144/2023, de 9 de novembro, tal e como se indica na disposición transitoria do Decreto 59/2023, de 14 de xuño, polo que se establece a estrutura orgánica da Xunta de Galicia, e tal e como se refire na disposición transitoria primeira do Decreto 79/2023, do 22 de xuño, polo que se fixa a estrutura orgánica das Vicepresidencias e das Consellerías da Xunta de Galicia, sobre a subsistencia da estrutura e das funcións dos órganos superiores e de dirección.

No mencionado ámbito material, constitúe un dos obxectivos do presente convenio co Colexio Oficial de Psicoloxía de Galicia a elaboración dos informes psicolóxicos solicitados polos xulgados de familia de modo que se poida superar o atraso acumulado.

Antecedentes

Os equipos psicosociais do Instituto de Medicina Legal de Galicia (IMELGA) créanse a partir da incorporación ao mesmo dos psicólogos con destino nos xulgados de familia que existían na Coruña, Pontevedra e o adscrito á Clínica Forense de Vigo. Coa creación do IMELGA no ano 2006 e os cambios lexislativos, nomeadamente en materia de violencia de xénero, fai que se creen prazas de psicólogos e traballadores sociais en todas as Subdireccións e que se dote dun segundo equipo nas poboacións máis grandes (A Coruña e Vigo). Así, no ano 2006, ano de creación do IMELGA, o corpo de psicólogos e traballadores sociais do Imelga estaba constituída por 10 psicólogos e 9 traballadores sociais, sumándose outro psicólogo máis, con destino en Ourense, no seguinte ano 2007.

En materia de familia, os iniciais equipos, quedaron inmediatamente desbordados coa súa incorporación ao IMELGA, dado que viron subitamente aumentados o





número de xulgados que tiñan que atender e, por tanto, o número de asuntos, xa que empezaron a responder as demandas de todo o territorio da Subdirección do IMELGA no que quedaron incorporados. Incluso nos territorios onde se nomeou un segundo equipo, os peritos non puideron responder a gran demanda de valoración nesta materia, á que se sumou outras solicitudes de informes periciais, con especial significación da ligada á xustiza penal (violencia de xénero, credibilidade da testemuña en menores abusados, dano psíquico, imputabilidade, acoso, etc).

Nestes anos non só se incrementou o tipo de valoracións que se pide a estes equipos, sendo cada día mais frecuente que os Xulgados e Tribunais acudan a eles para concretar algunha circunstancia importante para a toma de decisións e para concretar os danos sufridos como consecuencia da situación que se dirime ante o tribunal, senón que tamén produciuse un incremento no número total de demandas, tanto por tipo de pericias, como en números globais.

As peticións que atenden os equipos psicosociais van moito mais alá das que se tiñan en mente no tempo da súa creación, de modo que a previsión de postos de traballo que se fixo, axiña revelouse completamente desaxustada ás exixencias reais. Se ao anterior engadimos as novas demandas de inmediatez que xorden dos cambios lexislativos e da propia presión da sociedade, atopamos unha situación gravemente disfuncional, con xeración de listas de espera en todas as Subdireccións do IMELGA, con tempos de espera superiores ao ano nalgúns territorios, e incluso con demoras de varios meses para as demandas que, por propia natureza (como as causas con preso), son de carácter urxente.

Neste tempo houbo moitos esforzos puntuais para solucionar o problema, intervindo naqueles sitios onde o atraso era maior, con nomeamento de equipos de reforzo. Pero esta medida revelouse insuficiente por varias razóns:

- Os distintos equipos de reforzo nomeados ao longo do tempo, non foron nunca capaces de alcanzar os obxectivos fixados, o que fixo que a lista de espera seguisse medrando.
- O desaxuste entre a demanda pericial e a capacidade dos equipos foise incrementado co tempo, de modo que a pesares dos novos equipos de reforzo se volvía á situación de retrasos que se tiña procurado solucionar.

Seguindo o modelo xa establecido polo Ministerio de Xustiza para, entre outras cuestións, a emisión de informes periciais, o presente convenio pretende actuar sobre esta situación tan gravosa para os cidadáns polo que, a Vicepresidencia Primeira e Consellería de Presidencia, Xustiza e Deportes pretende asinar co Consello Xeral de Colexios Oficiais de Psicólogos un convenio para a elaboración dos informes periciais de traballo social solicitados polos xulgados de Galicia de modo que se poida superar o atraso acumulado.





O funcionamento dos equipos psicosociais do Instituto de Medicina Legal de Galicia (IMELGA) están na actualidade desbordados polo gran número de informes que deben realizar, en grande medida porque se viron subitamente aumentados o número de xulgados que tiñan que atender e, por tanto, o número de asuntos, xa que empezaron a responder ás demandas, especialmente no ámbito de familia, de todo o territorio da Subdirección do IMELGA no que están integrados. Os técnicos destes equipos non puideron responder á gran demanda de valoración nesta materia, á que se sumou outras solicitudes de informes periciais, con especial significación da ligada á xustiza penal (violencia de xénero, credibilidade da testemuña en menores abusados, dano psíquico, imputabilidade, acoso, etc.). Para abundar nesta situación, non só se incrementou o tipo de valoracións que se pide a estes equipos, sendo cada día mais frecuente que os Xulgados e Tribunais acudan a eles para concretar algunha circunstancia importante para a toma de decisións e para concretar os danos sufridos como consecuencia da situación que se dirime ante o tribunal, senón que tamén produciuse un incremento no número total de demandas, tanto por tipo de pericias, como en números globais.

Como unha solución puntual a esta situación preténdese asinar un convenio co Colexio Oficial de Psicoloxía de Galicia que ten por obxecto a realización, por parte do colexio, de informes periciais psicolóxicos a solicitude dos órganos xudiciais en Galicia que, nestes momentos, están en lista de espera por non poder ser atendidos polos técnicos do IMELGA. A posibilidade da sinatura dun convenio desta natureza co Colexio Oficial de Psicoloxía de Galicia está amparada pola Lei 11/2001, do 18 de setembro, de Colexios Profesionais da Comunidade Autónoma de Galicia que recolle que a Comunidade Autónoma poderá encomendar aos colexios profesionais, a través do correspondente convenio, a realización de actividades de carácter material, técnico ou de servizos da súa propia competencia, podendo celebrar convenios de colaboración cos colexios profesionais para a realización de actividades de interese común e para a promoción de actuacións orientadas á defensa do interese público.

O fin social deste convenio ven sinalado polo feito que os informes que deberán ser realizados ao amparo del, versan nunha gran maioría dos casos sobre menores afectados por procedementos dos xulgados de familia ou incluso sobre menores vítimas de delitos, polo que resulta prioritario que os xulgados que entenden destes asuntos podan dispoñer, a maior brevidade posible, dos informes necesarios para a toma de decisións nuns ámbitos tan delicados. Por este motivo, os colexiados encargados da elaboración destes informes serán coidadosamente seleccionados polo colexio entre os colexiados que cumpran cos requisitos xurídico administrativos para o exercicio profesional, e que teñan formación e/ou especialización no ámbito xurídico ademais de ter realizado actividades de similares características e





exercerán as súas funcións sempre a petición dos xulgados e tribunais, actuando no ámbito da súa disciplina con plena independencia e baixo criterios estritamente científicos.

Tendo presente o fin social destas actuacións, o convenio establece unhas contías máximas como compensación económica pola realización destes informes, garantindo, por unha banda, a axilidade que estes procedementos xudiciais demandan, e, por outra, a utilización racional dos recursos públicos, sen obviar os intereses lexítimos dos profesionais a quen se lles asignen a elaboración destes informes técnicos, de modo que se establecen as compensacións económicas tomando en consideración non os prezos de mercado, se non a retribución media que lle outorga a Administración a un membro dun corpo para o que se esixa titulación similar á requirida pola materia de ditame de acordo cos baremos establecido na Orde do 11 de xuño de 2018 pola que se determinan a contía e o procedemento de abono das probas periciais a cargo da Administración de xustiza en Galicia.

Finalidade: Para os efectos sinalados, tense previsto formalizar co *Colexio Oficial de Psicoloxía de Galicia* o instrumento convencional arriba referido por un período de vixencia que abrangue dende a súa sinatura ata o 31 de decembro de 2024.

O convenio ten por obxecto establecer as bases da colaboración entre a Vicepresidencia Primeira e Consellería de Presidencia, Xustiza e Deportes e o Colexio Oficial de Psicoloxía de Galicia para a realización, por parte do Colexio Oficial de Psicoloxía de Galicia de informes periciais psicolóxicos a solicitude dos órganos xudiciais en Galicia. De modo que os psicólogos que realicen estes servizos deberán ser seleccionados entre os colexiados que cumpran cos requisitos xurídico-administrativos para o exercicio profesional, conforme aos seguintes criterios e pola orde de prioridade en que se relacionan:

- 1.º O desempeño de actividades de similares características
- 2.º A formación e especialización no ámbito da psicoloxía xurídica.

O instrumento convencional que se pretende asinar fundaméntase no seguinte:

- Os psicólogos que presten estes servizos deberán ser seleccionados polos respectivos colexios profesionais entre os colexiados que cumpran cos requisitos xurídico administrativos para o exercicio profesional, e que teñan formación e/ou especialización no ámbito xurídico ademais de ter realizado actividades de similares características. Exercerán as súas funcións sempre a petición dos xulgados e tribunais, que derivarán a petición directamente ao Colexio e de acordo coas instrucións concretas que estes indiquen para cada





caso, e actuarán no ámbito da súa disciplina con plena independencia e baixo criterios estritamente científicos.

- O Colexio Oficial de Psicoloxía de Galicia ten como competencias propias o ordenamento do exercicio da profesión de psicólogo en todas as súas formas e especialidades, a representación exclusiva da mesma e a defensa dos intereses profesionais dos Colexiados, a vixilancia do exercicio da profesión, facilitando o coñecemento e cumprimento de todo tipo de disposicións legais que afecten á profesión de psicólogo, e facendo cumprir a ética profesional e as normas deontolóxicas do psicólogo, así como velar polo axeitado nivel de calidade das prestacións profesionais dos Colexiados, para o que promoverá a formación e perfeccionamento destes e cooperará na mellora dos estudos da licenciatura en psicoloxía. Tamén son funcións propias do Colexio o fomento da promoción e desenvolvemento técnico e científico da profesión e da ciencia psicolóxica, a solidariedade profesional e o servizo da profesión á sociedade.

Financiamento: Co fin de financiar os gastos relativos ao nomeamento dos psicólogos que realizarán os informes psicosociais, a Vicepresidencia Primeira e Consellería de Presidencia, Xustiza e Deportes financiará ao Colexio Oficial de Psicoloxía de Galicia ata un importe máximo de 41.100,00 €, sendo abonada ao Colexio Oficial de Psicoloxía de Galicia, do seguinte xeito:

- O Colexio Oficial de Psicoloxía de Galicia emitirá, con carácter mensual, a correspondente certificación do cumprimento da finalidade para a que foi concedida a axuda, na que se detalle os informes periciais efectuados. A Vicepresidencia Primeira e Consellería de Presidencia, Administracións Públicas e Xustiza comprométese a aboar ao Colexio Oficial de Psicoloxía de Galicia os gastos que deriven da realización dos informes periciais, cun pagamento máximo único a razón de 600 euros por cada informe, que incluírá todos os gastos xerados pola intervención pericial.
- Ademais, a Vicepresidencia Primeira e Consellería de Presidencia, Xustiza e Deportes compensará ao Colexio Oficial de Psicoloxía de Galicia pola organización da actividade realizada cunha cantidade de 1.500 euros.

Polo exposto, considérase xustificada a utilización do instrumento do convenio para articular as actuacións de referencia, quedando o dito convenio fóra do ámbito de aplicación da Lei 9/2017, de 8 de novembro, de Contratos do Sector Público, con independencia de que, ao abeiro do previsto no artigo 4 da dita norma, lle sexan de





XUNTA
DE GALICIA

VICEPRESIDENCIA PRIMEIRA E
CONSELLERÍA DE PRESIDENCIA,
XUSTIZA E DEPORTES

aplicación os principios desta lei para resolver as dúbidas e lagoas que se puidesen presentar.

Santiago de Compostela, na data da sinatura dixital

O Director xeral de Xustiza

José Tronchoni Albert

Dirección Xeral de Xustiza
R/ Madrid 2-4, 2ª planta
15781 Santiago de Compostela

CVE: dk4ecJX4klV1
Verificación: <https://sede.xunta.gal/cve>

